

國家圖書館藏

中華歷史人物別傳集

綫裝書局

瓜爾佳氏傳

瓜爾佳氏貞女碑文

生於嘉慶戊辰年八月十二日戌時
歿於同治甲子年九月初十日申時

先姊瓜爾佳氏五十七壽之末字女也幼明敏不苟
言笑知書善女紅長通曉義禮能容物鑒別是非遇
事斷之輒中肯綮戚里見而悅之曰之子寓精明於
渾厚將來可為載福之器勢必至理固然也迺天既
予以十全之心竟不予以十全之身先姊年甫七
齡即染脫骨傷寒病症愈後半載腰骨忽然隆起
先母日夜憂思多方覓治延外科數十人服良數數
百劑而筋骨日見曲拳竟至不可救藥厥後藥毒結
瘡瀕年屢發垂死者不知凡幾此齡所以追溯昔年
而潛焉出涕者也先姊年十齡即知仰體親
心病劇時多方掩護不使親知稍愈即攻鍼指
事無鉅細從不敢疾言遽色稍露於親前迨
先母見背之日生事死殮又無一不盡禮盡誠其孝
行有如此者先兄未歿時齒年尚幼先姊則諸
事推讓一切飲食衣服除供奉先母外無不次
及兄弟每遇大事則見其早作夜思多方籌畫並不
搢手足之短以炫一己之長其友于有如此者方

先姊之及笄時也

先母憂甚呼齡等至前示之

曰女大不嫁吾死豈能瞑目因擬買婢議婚事寢成

矣不期先姊從旁得聞以為

姊恐留身後之

尊會當以死報

親恩乃竟撒其環瑱三日不食

家人勸慰不怒亦不喜一若置死生於度外俾

親心無憾於生前無疚於身後而後安者我

窺之惻然不忍也於是攜齡跪

母前而告曰兒

等雖俱不材豈遂不念手足情異日無論貧富甘苦

願與共之淚隨言下舉室哭之皆失聲

先母嘆

息良久始允所請而

先姊自此轉悲為喜意氣因

之愈平言行因之愈謹蓋其所見者大斯其所就者

宏既無傷乎父母之心復無失乎手足之義噫其殆

北宮之女嬰兒子復見於今日耶其節烈有如此者

齡十六歲時

慈母棄養先兄相繼辭世彼時

先嚴年近七旬遭此不幸精神大為頹減呼齡至榻

前而告曰我年老矣不能為汝作經營將來汝讀書

有成便是給汝留下家計汝好自為之無負我言齡

跪聆之下悲感交集

先姊以

嚴親年邁自理

家務上以盡養

親之志下以紓愛弟之情齡夜

讀姊夜織蓋三十年如一日也迨

嚴親見背

之後齡始得舉孝廉成進士皆先姊佐理家政俾

齡無內顧之憂之所致也其勞勩有如此者伏念齡

一介寒儒十年水部甫邀外用又擢京卿正思鶴算

添籌冀耐積勞之素豈圖瑤池返駕竟成無主之魂

先姊於客秋染患痼疾一病遂至不起延至今年九

月初十日竟爾溘然長逝是五十年之艱難困苦終

不得一二日之休息安聞胡天不憫一至於此耶嗚

呼終天抱恨子職既不能無虧同氣興懷悌道更無

由克盡謹述巔末以示不忘我後世子孫觀斯誌而

觀感興起庶不使斯墓之淪於荒煙斷草中也是則

予之志也夫是則予之志也夫

同治三年歲次甲子九月

賜進士出身日講起居注官詹事府詹事

同懷弟魁齡撰并書

瓜爾佳氏傳

瓜爾佳氏者同年魁華峰侍郎之姊也幼穎悟得父母歡七歲罹寒疾以至於長父母有憂之每媒妁至女輒不食曰女不欲以他日貽父母憂也父母窺其意有異乎常人之所處者遂不復議嫁事女性至孝能撝作事無纖細皆躬親之先女有兄母歿後父兄亦相繼逝家貧女以女紅易益米佐侍郎讀書每夜一燈機聲軋軋然侍郎讀不輟機亦不輟隣里皆賢之今侍郎成進士得清秩而女以疾終年五十七矣侍郎悲其姊之歿也既述其遺行樹碑于墓復屬蔭傳之

論曰孝子之事親也有直而行者也有曲而致者也事非一端亦盡其心之所安而已矣女以疾故不嫁而貽父母憂嫁焉而愈貽父母憂而其所以憂之者

父母不得而喻諸女也女以父母所不得喻者而獨喻之五十七年以處于終也其志亦良苦矣或曰男有室女有家不嫁則廢人之大倫不可謂之孝或曰願為人兄事親之日長也女以不嫁而終事其親其為孝又孰大於是而女皆不知亦行其心之所安而已矣雖然不嫁者女之志也而所以得遂其志者則又侍郎兄弟之有以成之也昔李勣為姊煮粥姊或止之則曰姊老矣勣亦老雖欲數為煮粥得乎當女議嫁時侍郎之言曰異日無論貧富甘苦願與共其視古人同不同為何如耶予讀侍郎之文既悲女之志而又歎侍郎之能成其志也嗚呼是可以傳矣

賜進士及第都察院左副都御史署工部右侍郎兼管錢法堂事務

南書房翰林吳縣潘祖蔭頓首拜撰

碑誌徵辭

巾幗芳徽重景行盟心何止十年貞支離自古
全天賦泚慎於今播令名閨內黃香真孝子女
中許武勝難兄好將閨範傳家乘潛德幽光
共闡明 丙寅三秋前二日

華峯侍郎屬題 恭親王

敬紀

貞姑瓜爾佳氏碑誌

名門泚媛頌柔嘉缺陷天留表聖媼松到曲拳
方有節玉經顛扑總無瑕環瑱撒盡能全志孝
弟教成不出家五十七年埋淨土墓門開徧女
貞花 俚句錄呈

華峯仁兄大人郢正 錫山劉有銘

載稽往古典型攸存金石與炳懿徽同論泚德
昭式矧在閨門北宮嬰子古風克敦

嗟彼泚媛胡阮其遇志以素貞節由性固璵
珠在淵潛光可溯太璞在山貞質自賦

藹藹椿萱護韡韡華芳同氣聯枝扶植相將

春暉晻曖永念榆桑膏志沒地長懷弥忘
汲水挈瓶罄罄疊耻大義攸持功在濟美勞
不為矜瘁焉盡止懿德是程言垂箴史
幽光匪顯潛德匪名幽蘭無言孤芳自清守
貞若裕處困彌亨表幽闡微懿範景行

筱岩鍾岱拜題

瓜爾佳氏習禮明詩窈窕柔泚受福之基胡
天不弔病骨支離病骨支離藥不可醫解一

父兮母子慈焉心惻及笄遣嫁肯不可失女

心傷悲三日不食解二南山石石不磨古井水

水不波師北宮之徹環兮誓堅白而靡他

解三朝上高堂暮上高堂朝朝暮暮錡釜筮

筐女孝如子孝父母壽而康解四有弟有弟

篝鐙讀書書聲琅琅兮機聲徐徐三十年

中甘苦俱解五卷施草女貞木闌幽芳人如玉

歲歲墓門宮碑高築願采風於輶軒子禁

千秋之樵牧解六

歲在珥蒙赤奮若嘉平月奉題

瓜爾佳氏貞女墓碑 長洲趙祖賢拜稿

賞音一自託師幃賢媛聲稱仰令徽課弟
分燈思夜讀養親寸草報春暉女貞懿行
今親見儒素家風古所稀喜得鵲原膺繡
服天倫永篤冀瓊闌無端二豎重相侵
留得芳規作女箴并水瞻依千載志米鹽
辛苦半生心譽馳梓里仁風遠春去蘭閨
愛月沈一片青珉徵紀寔懿型終古想同
欽 丙寅春二月 恭 應

夫子大人鈞命敬乞 訓政

受業文輅呈

題瓜爾佳氏貞女碑文

從來逆境出奇英一樹高寒屬女貞但使
祥鸞常潔羽何妨孤鳳不雙鳴閨幃鮮順
椿萱意巾幘能懷棟蓼情數尺鮮碑千載
志鵲鵲原上淚盈盈

聰明載福已非常痼疾纏綿更可傷撒盡
環瑱全大節家聲孝友總流芳

幽閒貞靜共含包針黹何曾為病拋佐讀
廿年勤曉夜功名成就感同胞

五十年來苦潔操聲名嘖嘖到詞曹女中
懿範堪師表家政辛勤莫憚勞

歲華寒暑任頻加如蘗含冰意不差歷盡
折磨完太璞千秋貞節認黃沙

雍陽後學劉春熙拜慕

讀瓜爾佳氏貞女碑七古二十韻

君才今之井大春石渠備問掌綵綸人重門楮
欽宿學談經問字超等倫詎知張觸感有因伯
姊能守不字貞為參慙慙語淋瀝未陳佳事
淚霑巾憶昔先人共鞠育可憐沉痾成覺獨歛
疾未瘳藥瞑眩女紅刺繡兼勤讀有時脩灑奉
晨昏有時節口營饘粥裏常嗟脫粟無從
中差幸歲書足況值少年困躓場雁叫冷月蟲
吟霜殘燈半穗共圍坐刀尺聲催伊吾長阿弟
阿姊相依久紡磚書簾同徜徉萱背椿庭繼周
謝經綸根抵箭文章五十七載驚水逝勸學

之言猶在耳碑狀連篇誌不忘儒毫先乞歌詩
紀古耒釵鈿耀羅縠搖落風霜何其速惟此
歲寒松柏心人紀摭柱同岳賣傷心未及採輜
軒女嬃空向竊妹哭蒐羅白璧此無瑕九幽
炳若三光燭買紈繡出女貞花補題史館汗青
竹千載煌煌彤管輝褒揚 天語藏瑤櫝

右呈

華峯閣學仁大人 教正

渭南後裔陸蘭金未定藁

瓜爾佳氏哀辭 七絕四首

蘭心蕙質不知春五十年華未字身莫為支離

嫌病態要留古節比松筠

北宮撤瑱費經營孝友由來本性生午夜機絲

鳴軋軋劇憐幼弟讀書聲

不羨鴛行愛雁行卅年黽勉志凌霜棣花已發

曇花渺一曲蒿歌恨正長

盡性緣知即踐形孤芳鬱鬱秀及青別令節孝

開生面彤管千秋姓氏馨

華峯同年誼篤天倫克敦悌道女兄未嫁壽

終作文刻石以示後人並屬同人題詠謹

成四絕句用誌欽仰 常熟楊泗孫

心如蘭蕙性松筠那管天災與風因痼疾自安
堅不字空閨五十七年身

恐惹親憂深諱疾勤規弟讀力持家我行我意
尋常甚漫把嬰兒子並誇

願甘藜藿受艱辛望弟成名早立身今日果然

能遂志九原含笑見雙親

載讀鴻文感不休自言恩未女嬃酬故留碑與

兒孫看來飯他時掃故邱

勉成七絕四章應

華峯二兄大人 哂正

愚弟伍忠阿未定稿

蘭香而韻菊淡而幽孤芳絕世孰與匹儔緬彼
髫齡詩禮昭悲匪癖煙霞乃成痼疾及笄待
字隱慰親心女貞採掇寄意遙深眷戀庭闈
願終奉養情篤友于肯甘遜讓自操家政勞

與弟分篝燈紡織用佐辛勤壽老椿萱名成
昆季已屆古稀厥志云遂積勞成瘁病入膏
肓斂寬濯魄玉壺清涼天乎何尤潔來潔去
哀些一聲想停鶴馭

華峯二兄同年薦於友愛憲姊之幽貞不著
持手書其顛末垂諸金石徧示戚友用廣
傳聞敬茲泚德亟需表揚不揣譾陋勉綴
數語以當追輓云耳

東之氏衍勢拜頌

偉哉令德信希有子繼蘭矢搃甘皓首兮
雍庭闡昭孝友予藹藹雁行序先後兮卓
彼四維賴綱紐子冰霜其心行瓊玖兮漆室
銘貞未足偶子門閭表節同茲守兮偉哉令
惠欽不朽子

華峯前輩大人屬

柔兆攝授格孟陬晚福臣故題贊

題瓜爾佳氏貞姑墓碑

瓜爾佳氏之貞姑生性孝友為名姝通書曉

義閨中儒更誇纖巧他人無造物者忌厄其驅
生有奇疾窮醫巫父母購婢命與俱女大及
笄當有夫貞姑守貞志不渝終身侍親心所
愉此心切切反哺烏此身依依傍母雖苦若藜
藿甘如荼羞簪金鈿衣羅襦身如槁木心先枯
親亡兄死生何圖望弟成名忍斯須心計生
活躬勤敏北宮嬰兒事無殊五十七年淵龍珠霞
光鬱勃照寰區君不見九華寶帳七香車繁
華過眼同電驅隨時榮落柳與蒲誰知貞
姑心迹孤堅同金石完終初渾如太璞難瑕瑜
山精避道神鬼趨氣塞天地雷霆轟男兄名
節當何如

丙寅夏日秀水錢官俊拜篆

宮詹為姊勒碑覽其行實奇節卓著題
此以誌欽仰

天留淑媛保殘生孝友敦崇病骨撐烏哺有
情伸孺慕鳳飛何事卜鏘鳴兩三同氣連枝
護五十餘年太璞貞華髮滿頭仍室女松筠

志節早心盟

誼薦鵠原慘別離蓋棺定論勒豐碑難忘
餐飯分甘日苦憶篝燈伴讀時浩氣如生依
伯仲貞魂雖死戀庭帷九泉靈爽應含笑阿
弟勲名重鼎彝

敬堂田雨公未定草

華胄莪莪重尹姑純孝居然出瑤質北宮至老
尚嬰兒抱媼婺女原無匹獨抱春暉寸草心陔
南堂北職堪任冰姿不受紅閨福淑惠無慚女
史箴貞心老去以彌摯惟將紡績襄家計機
杼分來課弟燈蓼莪揮盡思親淚周甲年華
薤露晞侍郎煮粥有深悲孝娥碑碣今重見
獨愧寸無幼婦詞

奉題

孝女瓜爾佳氏碑誌錄呈

郭政 丙寅季夏錢唐子儀夏鳳翔未定草

少小嬰奇疾終占不字貞身堪冰比潔心與月
同明孝友超千古酸辛了一生勒碑傳懿行流

俗漫相驚

華峰年伯大人以亡姊墓誌

命題謹呈五律即請

教正 年愚姪多春拜稿

賢姊多年謁芳徽久見知德容欽里黨才藝表
京師病骨承天命貞心範地維性成純孝友情
善慎威儀處室明懸鏡治家密理絲一言期必
中百事賴咸宜益篤頤親志恒存愛弟思宵
深勤伴讀日永謹相持願學人倫至終超女
節奇和平神默運廣大化潛移璞玉歸真際
渾金斂彩時忽聞仙駕去千古緬留碑

歲次丙寅夏日長白崑峰玉山拜題

貞女吟

貞女善葆貞女真貞女曲盡貞女倫貞女能安
貞女命貞女特立貞女身貞女有生抱痾病病
纏膏脇屈不伸三十未嫁父母嗔女命如懸絲
一縷貞女難兄復難弟並跼牀前嘔沾衲同胞
生膝下男女託體親自分嬰宿疾與世乏緣因

兒能一飯亦一飯兒但憂道不憂貧原來至
性泣真宰從此天顏霽二人家世轉移家道淪
一姊一弟倍艱辛弟鉛繫姊縫紉弟心荼不苦
姊指棘忘鉅姊和態九佐弟讀弟博脩補助
姊薪只謂餘生無地措那知厚福自天申金粟
影中香擢秀蕊珠宮裏餅嘗新騰聲虞部
人瞻鳳鵬拜皋言世卜麟一院有花榮月姊十
年為國出名臣有辭難肖恩湧德無筆能
書愛棣仁我皇上元甲子春姊年六旬弟
五旬猶戀病軀延歲月獨憐使節走風塵弟念
姊心忤忤動作傳研思漏數巡墨與淚俱聲嗚
咽姊魂已是司花神貞女貞女絕縑磷何不奉
書達紫宸驚章飛下九城闈可與緹
紫曹娥鼎足砥

黃毓桂拜題

讀魁華翁先生痛姊碑文有作

我識魁宮詹得讀宮詹稿中有金石文哀愴
情綿藐云姊夙聰慧二人明珠寶七齡奇疾嬰
十全醫師少幽閒處深閨不字謝梅標色笑娛

椿萱辛勤佐兄嫂自小賦白華環瑱撒至老痛
哉天運蹇雙親棄兒早韡韡常棣華生折一
枝槁死喪何頻仍家計傷潦倒阿姊勗阿弟固
窮強哉矯讀書貧亦佳原不在溫飽人子志顯揚
此身責非小阿弟成進士厯官膺上考阿姊病
綿延去歲埋荒草念姊生平賢女宗堪師表念
姊生平勞紡織徹昏曉艱苦五十年彈指光陰
了冰雪證前身魂魄歸瑤島勒石示子孫寄痛
刪詞藻至性鬱奇文字字皆精好惟孝友兄弟
施政胥是道君其推此心病瘵俱在抱無告起顛
連用以佐

義暉

山左海邑後學心齋李奉廣敬書

徹瑱行為孝女瓜爾佳氏作

何處碑文榻一紙如有悲風紙上起曰孝曰友曰
節烈寫出人閒奇女子出何門瓜爾佳氏既
善女紅又明詩禮料事還能中肯綮福慧兼
父母喜一解父母問女女何不怡女言無他而
日就支離骨隆起形委蛇乃千斯藥百斯醫毒

入膝理無可為吁嗟乎斯人而有斯

二解 軀雖

孱節愈勁妝臺無復臨青鏡父母無憂女女有

命女命雖艱女心定亦解承歡知愛敬朝勤抑

搔暮溫清盤辟焉操作焉為我父母襄家政

三解

女年及笄父母懷其譬於操梅傾筐堅之豈有

女子而終母家為囑媒媼買婢使媵吾兒吾兒

論嫁幸母遲嫁早轉恐兒心悲囑媒慎勿令兒

知四解兄弟感矣堂下伏矣噉然哭矣欲父母告

矣曰是不食且信宿矣勸之不言怒在腹矣兒

雖不才詎不念骨肉矣脫亦有是疾必不棄於

非族矣酷矣酷矣嫁裝其母俶矣五解父母慨

然涕也連連汝兄弟如是余何求焉起勸汝姊

眠食如前女也聞此乃不當登仙事居送往式

禮莫愆艱苦備嘗蓋五十七年六解五十七年

家以大起昔也水曹今也學士轉憶當時淚不

止一燈風雨秋窗裏伴我書聲姊十指而今食

報止於此人生有恨何時已七解我謂公可勿

然自古身名不兩全逸樂養世儘有草木同

腐吾悲焉孰若身苦名則傳黃絹字彤史編嬰

兒子誰千年八解

山左海邑李夢麟敬書

父兮生我母兮鞠我天不我恤疾病淹留自少

至長貽父母憂一解父延良醫母調良藥為祝

昊天我疾弗作二解痛我非男子克顯親名何

以酬罔極無愧此生三解我年及笄日侍親膳

親猶隱憂獨深眷戀四解親不我恕我忍離親

矧子兄弟均屬至仁願長依膝下庶全天真五解

天降青災遭家不造母殞兄摧中心震悼六解

父心曷慰有弟能文惟子佐家政夙夜辛勤七解

弟名既成父年弗享兢兢疚心哀動閭黨八解

嗟予嬰痼疾夙殫親心匪惟鞠育受恩最深九解

矢志報恩恩終未報泣望松楸苦衷誰告十解

弟宏丕業光顯門庭余心無歡願常傍親靈十一解

地下從親親靈允悅惟彼孝思用全貞潔十二解

古有嬰兒子厥惟北宮載揚芳烈永播遺風十三解

華峰二兄同年大人以所作 令姊碑誌賜閱

並以徵詩謹賦呈政

年小弟慶錫綸拜稿

華峰年老前輩大人以所作

令姊碑誌囑題敬賦二律即希

教正

北宮貞孝世間無皎潔冰心在玉壺邁疾身難
尋扁鵲承歡心自戀慈烏華堂惟願春暉駐寶
鏡常教夜月孤今日緹縈仙轡遠白楊風起暮
禽呼

孔懷氣誼篤連枝家政辛勤為主持井井有條
新米事乾乾自勵雪霜姿寧帷易動梁公感煮
藥頻增李勣悲鄭重數行碑誌泐當年懿範永
昭垂

年晚生慶錫榮拜稿

貞女碑題辭 并序

貞女瓜爾佳氏為 閣部魁華峯先生未字姊
也七歲嬰痼疾矢志守貞孝友兼盡襄理家政
尤勤壽五十有七先生哀其志為製碑文以表
其墓并徵同人題詠 元讀之肅然起敬謹綴此

辭以呈 郅政

天生貞女兮閨中英傑幼染沈疴兮腰為之折
願守貞而不字兮堅一心其如鐵及笄不可奪
志兮惟欲以死決幸骨月能調護兮俾完白圭
之潔矧孝友洵無虧兮復勤勞而補拙雖鞠躬
以盡瘁兮猶黽勉而不輟五旬有七忽西歸兮
弟哀姊以悽絕表貞心兮誌碑碣永千古兮名
不滅

鄉溪朱夢元拜稿

嗚呼玉女星沈織機石吟素仙魄墜寶鏡函空
此固人間天上地異情同者也

瓜爾佳大賢姊之逝也其行有足傳者以言其
德則曹娥孝親彼奇而此正也班姑友愛前易
而後難也以論其才則咏雪奪其工迴文讓其
巧也夷攷所遇則夙抱孀人之疾夜繅寒女之
絲也天以境困之己以心貞之是丈夫也乃巾
幘乎卒之十年不字視藥如飴八口相依味冬
若夏遂使弟成進士姪舉茂才先志克承家聲
足振卅載苦心至斯慰矣一朝撒手去也飄然

因之有弟構文涕隨筆下屬余作贊目送雲飛
爰下一轉語曰讀此碑而不墮淚者其人必不
悌 同治四年八月上浣

年世侍生何毓福頓首拜謨

百年潛德幾人知茹蘖含冰却為誰天遣齡
成痼疾要完白璧返瑤池
春雨聽經日就離秋風煮葯恒熬髡即今臺閣
猶餘恨苦憶挑燈佐讀時

還丹無用說長生月冷闌河獨雁聲刀尺不聞
長恒迴傷心五十七年情

行人嘖嘖說芳蹤指點新碑馬鬣封為有守貞
人不朽北邙山下盡貞松

華峯世井大人以 令姊遺徵碑文見示

命題因賦四絕句呈

政 桐鄉世愚姪金星榆初葉

閨中孝友世爭誇淑德偏鍾貴冑家五十七年

貞不字千秋名重女兒花

從來名教重完人每向倫常見性真如此孝親

兼愛弟何妨一現妙蓮身

紅蘭生小便經霜自是天心善主張白骨流芳
冰玉潔貞珉一字一珠光

乾坤清氣得原難竟剖香名到蓋棺閨閣同時
欽令範也如山斗願瞻韓

恭題

華峰先生大人 令姊貞珉即布 斧已

長白書敬未是草

鬱鬱女貞樹凌寒歲月深艱難佐家政宛轉慰
親心禮教名門秉風徽戚黨欽鵲原為表墓濡
墨淚沾襟 承

示碑文敬題四十字知不足表揚萬一也呈

請教正

歸安王思沂

孝友歸巾幘鬚眉愧不如侍親承色笑勵弟奮
詩書楊庀悲天限松貞保太初墓門華表在可
以式鄉閭

佐弟持家政辛勤五十年此心鑑止水一夢醒

塵緣骨肉幾行淚碑銘萬古傳漫悲歸去速應

已證青蓮

勉成俚句二章以應

華峯丈人雅囑即希斧政 鄂禮呈草

恭題孝女阮爾佳氏遺碣後 六十韻

峇堯天姥峯終古立不移上有女貞木樛鬱儕
荆枝枝連數十秋同氣不忍離惟堅乃多節風
露存貞蕤卓哉不字女懿範錫崇碑自昔髫髻
歲至性超羣兒禮宗奉閨式姆教遵德規珣璣
自式度蘭芷方修儀蓬壁依爹娘弟兄常肩隨
貧家重操作勞勩安敢辭自矢貞女貞上慰慈
母慈彼蒼何不仁一病憂難支女且歛病容不
令父母知詐意生我心顧女深傷悲謂當及笄
歲大婚難踰期殷勤命媒氏堂上前致詞女甫
聞此言哽咽心不怡藐然一弱息惟父母貽罹
念此五內崩恍惚生狂癡之厄矢靡他苦節甘
如飴所願隨弟昆颯勉撐門楣女志不可回相
視交淚垂闔家婉語釋始復忘憂疑中年失怙
恃蓼莪哀讀詩素袂捐梳妝蓬首紛離披長兄

繼云殂隱痛心難夷邁難等集蓼傷心同卷施

悲嘯空閨房撫弟增鬱伊謂弟當勤修庶幾勿

棄基不聞駱公緒有姊不苦飢鄰家方讀書抱

聽憶賈逵古人不可作今昔無殊施家政遂拚

描龜手恒忘疲饕餮任經紀庭戶親支持書聲

雜機聲不問夜何其荏苒厯星霜日月如駒馳

家道可振興惟天實鑒之冥冥有主張文士豈

數奇窮巖枯卉枯倏忽華風吹秋桂先探香杏

苑瞻

天墀十年當水部外任重監司清班轉崇階黼黻

贊

綸絲同思勵志初艱屯逢險巇非姊善處家安得如

今茲同懷老彌篤冀進延齡卮胡為促年命返

駕歸瑤池豈其宿疹發病劇無由醫作粥思燃

鬚垂涕空漣沔何以報姊恩苦調淒壘麓大郎

旌門閭綽楔光蟠螭玉以為女墳墳上生蘭芝

蘭芝挹清露香藹山之陞中天大星長照耀同

朝曦我我石碣標一字一涕洟彤管應揚芬兮

德中閨推生具松柏心死完冰雪姿雖云非中
制表節終取斯遐邇共闡幽貞孝義靡虧詠歌
緬流徽觀者得兩師古來忠孝女千載此一時

恭馨呂銘恩敬題

恭題瓜爾佳氏碑誌

繫何人斯名門秀質齒未及笄无妄嬰疾葯餌
少閒弗自暇逸非儀胥無女紅備悉病常在躬
心不出室孰曰閨修鮮足稱述性既定堅始終
如一懽承椿護敬生弟姪阡柏青葱碣石屹萃
惜哉存年五十有七

振之玉英頃首贊言

瓜爾佳氏碑誌序并詩

夫自古才女多而德女少況才德兼全者乎乃
彼其之子其德能容其才足任誠卓卓不世之
誥也宜其厚德載福壽考不忘上答天心下副
人望胡冰霜其節蒲柳其資致令人歎聰明多
福人間少也雖然丁年多病或藉以全貞潔之
心甲運將盈已無虧孝友之德何必于歸宜其

家室縱非男子亦克亢宗此誠千古未有之奇
而實一門之望也縱北宮之女嬰兒子不是過
矣亦洞庭之落花人瘦未足語斯厯誌生平足
補烈女之傳緬懷懿行倍增閨秀之光嗟乎誰
謂善類可磨滅耶

鍾靈疑獨厚閨闈德既能容見且微底事才高
天不妬聰明多福古今稀

曉啓蘭閨露未晞豈因多病廢瞻依養親更體

安親志愛日棲霜念不違

養親有餘兼養弟不辭晝夜獨搥持費盡精神

無德色對人猶說樂忘疲

不惜一死報親恩脫瑱時欽節烈存大本無傷

同氣慰凜然曾不羨高門

何必于歸家室宜縱非男子亦搥持青燈耐久

欣常伴弟正呶唔姊織時

自守堅貞五十年堪憐人瘦落花天傷心寂寞

渾無著應是瑤台降謫仙

超然雅度脫風塵五十年來氣象新弟入仕途

姊辭世恨無一日慰艱辛

淑貞閨秀讚

星墀桂聯謹題

疾虧形質天補慧神背胸拳曲心膂展伸芳軀
任幻蕙性存真昇完全以後果償缺陷之前因
爾乃因心則友立愛惟親非惟父命知大體欲
長依父體豈悖親心篤深仁思永報親仁一念
烏私重耐怙恃百年鳳叶輕視婚姻持家以玉
律金科襄兄治事伴讀於青燈黃卷贊弟成人
惟其慈海不波元珠自朗情田無莠寶鑑時新
是以金精葆固玉璞含淳梅惟天潔菊不知春
靈耀五十七年靜貞之子品魄潛百千萬歲清
淨女兒身

竹溪達清阿拜題

瓜爾佳氏墓誌銘題後 並序

凡人為人之所甚難而甘人之所甚苦者必其
天性篤摯迥異恒流而其識之定與志之堅復
足以濟之者也若余解聞 瓜爾佳氏足異焉
氏為誰 華峰閣學大人之令胞姊也幼孝友

嫺書史善女紅及長 親欲嫁之以有疾辭
親乃謂之曰毋憲此子將以婢媵子 氏固不
可強之遂絕食 氏之兄與弟代為泣請竟從
其志迨 母與 兄相繼逝 氏遂自理家政
裕如也尤罔不先意承 父志家貧勛幼弟讀
書躬織紵嘗至夜分如是者三十年至 老父
棄養毀瘠之餘甚勞苦更倍於曩昔歲壬子
華翁成進士閱十年由部曹游升卿貳家稍裕
而其勤苦撙作一如乃弟未遇時甲子冬以疾
殂 華翁哭之慟為之樹墓且自為誌銘於石
慎得而讀之始悉其詳嗚呼 氏之所為其可
謂出於天性之至誠矣苟非其識定其志堅存
一毫計較之私一經有強抑與曲成之者鮮不
自便私圖隱忍以遷就之又何以見其志之果
遂也然使不以遭疾之故而竟不字事 親在
氏固其志素定而為之 親者於心終有所未
安斯人而有斯疾是固得天獨厚天豫有以全
之使之有所藉口以獨行其志也 賢姊之風

足以流芳百世矣夫豈待表揚而顯哉且慎學

殖荒落言之無文又奚足以闡懿德之萬一

弟以

華翁之命既不獲辭因思文言之不如其實言之也遲之久勉賦五律四章不足言詩聊以紀實謹錄如左恭呈

華翁大人 鈞政

所樂在天倫高堂有老親豈容滿至性翻爾事他人自遂瞻依願非闕疾病身當年如遠嫁誰與耐家貧

所適非無偶其如屈志難墳麓方競爽并水佐承歡織錦輕蘇蕙吟聲重木蘭何堪邁多難萬目鴈行單

詩禮承家範風流繼謝庭雪吟飛絮白燈伴下帷青畫荻心同切繅絲手未停成名義介弟

辛苦卅年經

病久費支持然鬚作粥時窮通共甘苦生死忽乖離尺土貞魂墓千秋血淚碑遺徽付彤史欲

贊莫為詞

李慎謹呈

題同學魁華峰痛姊碑文

華氏本知交同學逾卅載欽其友于情垂老心未改自言兄早亡家惟一姊在彼昔甫弱冠遇事姊主宰藥餌姊嘗服斯夕姊弗怠會文歸偶遲織紡批燈待疾苦已半生庶幾終壽愷詎意弟名成姊病早姜媵棺殮雖加慎妥靈擇幽塋姊賢无由彰淚灑墓前莖我到碑陰為流涕誼厚曾觀送死際新阡松柏勤護持樹碣復規長久計晚近誰知重同爰遠邁然鬚唐李勣不枉與君深結契在山玉衡未定草數里荒郊外淒涼土一邱悌心殊未了孝性定難休幸有刊碑者能無墮淚不九泉當感慟何日弟恩酬

丙寅秋初

霽人和昶未定草

承爾佳氏者今內閣學士輯華峯之姊也矢志養親終身不字有嬰兒子風沒一年矣閣學徵